

la volouze ! Meins la fée se tournit devers yelle e d'o le dai, o li arachit un zieu si vifrement q'o ne s'en avizit qe cant o fût devenue borgneuze.

## La goule és fées

1 En ma d'éfant : sur le point d'accoucher

2 Pentières : pentes, versants

3 Rote messière : route pour aller à la messe (qu'on emprunte souvent)

Un saïr qe la mère Miliy q'étaet saïje-fame de son état étaet assize su un berchet den l'coin de son fouyer, o ouit qheuqr'un qi cognaet a l'us de son ôté.

O débarit la porte e o vit entrer céz yelle eune vaille fame qi li dit come éla de veni d'o yelle tout contr Saint-Leunére a cette fin d'assister eune créyature q'étaet en ma d'éfant<sup>1</sup>, Miliy repondit q'o voulaet ben : o prinz ses solérs, mint su son dôs eune p'tite devantiere, raport a la fré, o qhutit son feu e sieuvit la vaille qi cheminaet devant yelle e marchaet par les sentes come s'il avaet été jou.

I y avaet mézë un p'tit de temps q'il étaent partis, cant Miliy oui le brut de la mé, qi menaet tenant de ramaije contr les rôches des falâzes.

Eyou q'ous me menéz. Q'o dit. Voul'ous me fere aler diq'a la Goule-és-Fées, ousqe n'en dit q'en vaye des fions d'aotr-faï ?

- Vére, Miliy, qe li repondit la vaille, j'alons directement la. Prends ma main, tu n'as qe fere d'avair pou

-Je n'veus point te défalâzer- Sieus mai e tu renras service a yeune de tes semblabls.

Miliy araet ben voulu étr core céz yelle ao coin de son fouyer ou ben den son let meins ole étaet forcéy d'aler eyou qe l'aotr la menaet e o marchaet su les pentières<sup>2</sup> des falâzes come su ene rote messière<sup>3</sup>

O finirent par ariver a la Goule-és-Fées, q'ét eune grotte escarabl caziment aossi grande come yelle a Pouliféy ou la Salle a Margot, qe les monsieuûs vont vair cant le temp ét biao e qi sont ao bâs de falâzes de Ferhel. O vit su n'un let eune fame toute jieune e q'avaet puzieurs personnes alentour de yelle. O li portit secou e bétot o reçu un biao p'tit gâre, ben mochet qi p'zaet

ben set livrs trâs cart ou le cart meins de uèt livrs.

Les aotrs fames donite a Miliy ene bouéte 'you q'i n-i avaet ene meniere d'onguent, câziment parai -respect de vous- a de la grésse de pouére e i li dite de froter l'éfant e de ben s'esuer les mains après de cela ou ben qi li en ariveraet ventiéy du deu.

O frotit la garçaille e sans fere mine de ren o se gratit un zieu o s'en minz un p'tit den n'un coin. O n'ût pas putot fet éla q'o vit tout chanjer alentour de yelle. La grotte étaet belle come ene egllice a la mi-oût, les fames étaent atifées come des princeresses e Miliy n'avaet ren vû de si biao ni a Saint-Mâlo céz les bourjouéz, ni den les châtiaos de Proubala, de Plleurtu e de Saint-Béria. O vayaet a l'entour de yelle toutes sortes de p'tits fions qi n'étaent pas pus grôs qe le peûce q'étaen hanës come des monsieuûs cossus e q'avaen a leu côtës d's épées qi n'étaent pas pus longues qe d's epilles a piécettes.

Ole ét ténant ebobée meins o n'dit ren e o frotit l'éfant diq'a ao moment q'i li dizent de fini. I li donite eune bone boursée d'arjient e la ramenite, ben benéze, diq'a céz yelle.

Depés le temp-la, o vayaet par les sentes, par les cllôz e un p'tit partout toutes sortes de fions meins o ne fezaet mine de ren. Un jou q'ole étaet a la faire de Saint-Béria éyou qe les touchous de Tremereu e de Peudeuneu viennent vendr leus poueres e leu nouretures, o vit les féys qi tenaen toutes sortes de p'tits jeûs pour bézer l'paovr monde e li voler sa paovr arjient.

O ne dit core ren le coup-la, meins cant ce fût su la raissée. A n'un moment, 'you i n-i avaet tenant d'monde ao Caroussé e alentour des marchands qi vendent des saocisses d'Pllancouet e des cimériaos o vit yeune des féys qi metaet sa main den la pochette de la devantiere d'ene chupée. O s'éberyit e o criyit a